

Jadi TPM bukan habuan tapi tanggungjawab, kata Zahid Hamidi
The Malaysian Insider
July 28, 2015
Oleh Hasbullah Awang Chik

Datuk Seri Ahmad Zahid Hamidi menyifatkan pelantikannya sebagai timbalan perdana menteri yang baharu menggantikan Tan Sri Muhyiddin Yassin bukanlah satu habuan, tetapi tanggungjawab kepada negara, bangsa dan negara.

Zahid berkata, Perdana Menteri Datuk Seri Najib Razak tidak membuat keputusan mudah melantiknya sebagai orang nombor dua dalam Kabinet, tetapi ia ditunjangi dengan rasa kebersamaan sewaktu berada dalam kerajaan sebelum ini.

"Saya tahu ini bukan satu habuan, ia adalah satu pertanggungjawaban yang saya harus terjemahkan untuk negara, orang Melayu dan seluruh bangsa Malaysia.

"Tentunya saya dapat memahami keputusan yang dibuat Najib adalah merupakan satu keputusan yang berat namun saya fikir atas rasa kebersamaan yang terlalu lama antara beliau dan saya," katanya.

Beliau berkata demikian ketika ditemui media selepas selesai Najib mengumumkan rombakan Kabinet baru di Pejabat Perdana Menteri di Putrajaya hari ini.

Katanya, gandingannya bersama Najib dalam mentadbir negara mengimbuai kembali saatnya menjadi setiausaha politik sewaktu Najib ditugaskan sebagai menteri belia dan sukan.

"Pemikulan tanggungjawab ini tidak dapat saya elakkan. Ini mengulangi sejarah lama Najib dan saya ketika beliau menjadi menteri belia dan sukan, saya dilantik beliau sebagai setiausaha politik.

"Selanjutnya saya mengikuti beliau ke Kementerian Pertahanan. Ini adalah satu putaran hayat politik yang saya tidak pernah jangka dan harapkan, tetapi Allah mentakdirkan, ia berlaku begini," katanya.

Mengekalkan portfolionya sebagai menteri dalam negeri, Zahid berkata jemaah Kabinet, pemimpin Umno dan Barisan Nasional (BN) digesa memberi sokongan kepada kepimpinan negara.

Katanya, segala usaha yang terbaik dan sedaya mungkin akan dikerah bagi menjalankan tugas sebagai timbalan perdana menteri dengan sokongan menteri Kabinet yang lain.

"Saya terima ini sebagai qada dan qadar, sebagai satu takdir.

"Saya mohon rakan saya dalam Kabinet dan ahli Majlis Tertinggi, ketua bahagian dan sayap dalam Umno malah kepimpinan parti dalam BN dapat memberikan dokongan terhadap kepimpinan Najib," katanya.

Insyallah saya berjanji akan membantu dengan yang terbaik dan sedaya mungkin mengikut kemampuan saya. – 28 Julai, 2015.

Copyright © 2015 Edge Insider Sdn Bhd

Source:

<http://www.themalaysianinsider.com/bahasa/article/jadi-tpm-bukan-habuan-tapi-tanggungjawab-kata-zahid-hamidi>